

Greetings from General Secretary

CBCUSA thluachuah za he lam a kan hruaitu Khuazing Pathian a min cu a zungzal in thangthat si ko seh!! 2021 nih a rak phorh laimi thluachuah cu nan Khrifabu cio ah tlung ko seh!!



Atu kan nikhua hi caan chia asi caah, caan tha nan hmuhmi poahpoah cu tha tein hman izuam u (Eph 5:16)

Vawleicung nikhua hi aa mah ti hrim lo. Minung si ko tung i nifatin tein hmai i huh, kut tlaih khawh lo, chungkhar i lenkai khawh lo, meeting tuah khawh lo, pumh khawh lo tiang in caan chia ah kan um ko cang. Pulrai ruang ah thinphang thlalau in kan um. Cu chinchap ah kum 244 chung hman cang mi, USA constitution dohkalh in election a dik lo tiah, a ruatmi nih US capitol building ah lut in duh lonak an langhter. Thil thar ngaingai asi.

Kum 232 chung tuah cangmi, US mizapi le vawleicung nih sunlawih tawnmi le zoh ciomi President Inauguration cu kum dang bantuk in lawmhpitu le thlacamtu tel thiam loin, Covid in a thimi minung 400,000 caah US thantar le Iraq le Afghanistan ral a tumi bang,

ralkap tu US capitol ah hngerhte bang an cawlcangmi lawng hmuh asi. Ngaih a chia ko. Kan ram ciacia ah Domestic terrorists um asi cang. Avoi 46th nak President thar thlacamnak zong tuah kel in tuah thiam asi lo, million zeizat dik thinphang thlalau in an um hnga? US founding Fathers hna thlarau zeidah a lawh hnga? Caan chia, caan tha lo hrimhrim asi.

Khuazing Pathian cu zeizongte ah nawlungeitu asi, zumtu dihlak thlacamnak thawngin January 20, 2021 ah President inauguration le power transition tuang te le dai tein tuah khawh asi. Lawmh a um tuk hringhran. Pu Trump nih US caah thil tha tampi a tuah mi hi philh hlah usih. Pu Trump families hna Florida an zuan hlan an mithmai le an zuan lio cu thinlung phundang ngai in a um. Duhtlin lonak vawlei asi ko. Pu Trump nih White House cabuai cunghah President Biden caah Ca a chiah takmi nih President Biden lung a lawmhter ko lai dah? Pu Trump le families le 2021-2024 US hruaitu thar caah thlacam piak hna usih.

Caan chia/ tha lo ah kan um ko. January 18, Martin Luther King Jr day ah mi thi ruak pa 4 kan i hunh. Meithal kahnak in minung pa 2 nih mual a kan liam taktak. Kanmah le kanmah kan si fawn. Lungretheih bawmh awk a tam ko. Caan chia ah kan um hrim ko. *Atu kan nikhua hi caan chia asi caah, caan tha nan hmuhmi poahpoah cu tha tein hman izuam u (Eph 5:16)*

Khuazing Pathian caah caan a um lo. Kum zong a um lo. Caan le kum cu minung tuakmi asi. Ephsians 5:16 ah kan hmuh bantuk in kan nikhua hna hi caan chia, caan tha lo, asi caah, caan tha, kan ngeihmi poah cu thil tha tuahnak ah hman i zuam usih. Ruamkai le porhlawt caan asi ti lo, dawtnak le remnak caah kan caan hman caan asi cang. Caan tha kan ngeihmi cu Bawipa lawmhternak, Khrih le a ram kauhnak le miphun caah hmang usih.

Khrifabu kip nih 2021 caah tinhmi nan ngeihmi vialte Bawipa kut ah pe usih. Thlacam hi CBCUSA chungum kan thazang, kan teinak, le kan ziaza ah si zungzal hram seh.

Khuazing Pathian nih CBCUSA le America thluachuah pe ko seh!!

Bawi Khrih ah nan tuan hawi,

T. Bawihrin

Thlaawr Bawihrin
General Secretary
CBCUSA
Indianapolis, Indiana



Rev. Thla Tin Thang

ICBM Myanmar Director

2021 January thla chung ah ICBM riantuannak ca ah phaisa kuantu a tanglei Khrihfabu pahnih cung ah lunglawmhnak tampi kan ngei . Pathian nih a thluachuahnak he lam hruai chin ko hna seh!

- (1) **Saint Louis Chin Emmanuel Church, MO:** An i zohmi ICBM Rakhine field chung Tharyarwadi biakinn (quarter he kemh chihmi) saknak ca ah ... **12,000,000 MMK**
- (1) **Lai Christian Church, Delhi, India:** An i zohmi Saya Cho Naing Hung (Kheih, Kanpetlet) chungkhar laksawng ca ah ... **100,000 MMK**

TESTIMONY - Shing Kit, Pakun Khua, Kanpetlet Peng



A hmasa bik ah CBCUSA program a simi ICBM riantuannak chung ah i tel kho ve ding in lam a ka hruaitu le thluachuahnak a ka petu Pathian min thiang ka thangthat.

Keimah cu Shing Kit ka si i Matupi peng Hatul khua ah Pu Ha Om le Pi Awi Hmun nih 1974 February 2 ah an ka hrin. Unau 7 lak ah upa bik ka si.

2001 in 2003 tiang CBC program CMC Revival ah kum 2 chung ka pum ka rak i pe. Cun Kanpetlet peng Samatha khua ah 2013 ah missionary in ka rak um. A hmai kum 2014 ah CBCUSA program ICBM riantuannak chung ah i tel kho ve ding in Pathian nih lam a ka hruai i Pakun khua (Kanpetlet peng) ah ka t̄uan. ICBM palai in Pathian rian ka rak t̄uan ka ah hin Pakun khua ah Khrihfa chungkhar inn 20 te lawng an rak si.

Pakun khua cu Kanpetlet khua thlang te ah a ummi a si. Atu ah cun Kanpetlet i sang pakhat bantuk in ruah a si cang. Ka fim, ka za aa timi tete an um pahnak a si. Ka um ka cu Khrihfabu chung ah siseh khua chung ah siseh i remlonak, i huatnak, buaibainak tete a um pah tawn. A bik in an nunphung bantuk in an ruahmi thil an zulh tawnmi nih buainak a chuahpi tawn. Khi tik ah nu pakhat dirhmun in an karlak i dir le remnak tuah cu ka ca ah a har ngaingai tawn. Mithi an um caan ah an tuah tawnmi cu ruak kha zaan thum le zaan li tiang an chiah. Sa an thah i ruak an chiah chung vialte cu zu an ding hna. Zu an din ruang ah pakhat le pakhat keimah tinak thilung he i entainak le i siknak tiang a chuak tawn. Cu bantuk i harnak tete a chuah caan ah mi le mi karlak i remnak va tuah ding ah ka si ning nih a tlinh hrim lo.



Sihmanhsehlaw, kaa bochanmi le a rian thiang ka ùanmi Pathian nih a ka zoh sawhsawh lo i a ka bawmhnak thawng in harnak tete lak ah teinak a ka pek tawn. Mithi an um tik ah khin an ka huat zong ah tiah Pathian bochan in Thawngthabia chimnak le cawnpiaknak ka ngeih tawn hna. Ka si khawh tawk mi va bawmh le pekchanhnak ngeih hi kaa zuam tawn. Harnak le lungretheihnak nih a ka zelh caan a tampi nain CBCUSA ramchung Khrihfabu vialte nan thlacamnak thawng in Pathian nih teinak (awngminnak) keimah khaap tawk in a ka pek. Biaknak dang in Khrihfa ah a cangmi zumtu thar tete zong a ka hmuhter hna.

Teinak hmuh khawhnak ca ah bawmtu a si tiah ka ruahmi pakhat cu ICBM palai pawl thlahlawh (lahkhah) an kan pekmi hi a tam ngai (a za ngai) tik ah chiat-that tik i mi va bawmhnak ca ah a thahnem ngaingai, ti hi a si. Cun, keimah a ka zohtu Saint Joseph Chin Baptist Church, MO nih biakinn aa dawh taktakmi an kan sakpiak tik ah mi thinlung a hliplauter.

Biakinn saknak ah chawva le thazaang tampi chuah duhnak thinlung zong a kan ngeihter, tiah ka hmuh. Saint Joseph Chin Baptist Church, MO Khrihfabu cu Pathian nih thluachuah tampi pe ko hna seh! Cuti cun, Pathian dawtnak thawng in Pakun khua ah thil sining tampi aa thleng i Khrihfabu zong duhsah tein kan thango cuahmah. ICBM palai dirhmun in Pakun khua ah Pathian rian kum 6 ka ùan chung ah Pathian nih zumtu thar tete a kan hmuhter i chungkhar 13 Khrihfabu ah kan i chap. Tu ah cun Khrihfabu inn 33 kan si cang. Mah tein a dir kho mi Khrihfabu dirhmun ah kan um cang.

Lamhruaitu Pathian min thiang ka thangthat. Saint Joseph Chin Baptist Church, MO cung ah siseh, CBCUSA ramchung Khrihfabu vialte cung ah siseh lunglawmhnak a ngan hringhran. Pathian nih a ram kauhnak ca ah in hmangchin hna sehlahw thluachuahnak in pe chin ko hna seh!

Saint Joseph Chin Baptist Church, Missouri nih sakpiakmi Pakun biakinn

